

պատկանող գյուղերը անձամբ շահի կողմից կարող էին վաճառվել մասնավոր անձանց: Այդպիսի անձնավորություն է եղել, օրինակ, հիշյալ Մուրադ բեկը, որ, ինչպես նշված է կալվածագրում, Մեղրի գյուղը ժամանակին գնած է եղել Շահ-Քահամարից: Սակայն, ինչպես տեսնում ենք, XVII դարում նորից Մեղրին հիշվում է խասս գյուղերի շարքում: Այդ փաստը գալիս է ապացուցելու հողատիրության և հատկապես համայնքային հողատիրության խիստ անկայուն և անապահով վիճակը: Տեղին է այստեղ հիշել Վ. Մինորսկու խոսքերը. «Այն դեպքում, երբ հողի սեփականության հարցում վճռական դեր կարող է խաղալ իշխանավորների բարի կամ չար արամադրությունը, ինչպես կարելի է սպասել, որ մարդկանց իրավունքները (այս դեպքում առավելապես համայնիկ, հողագործ գյուղացու իրավունքները— Հ. Փ.) ձևավորվեն և կայուն տեսք ստանան»<sup>43</sup>:

Ինչպես վերը նշեցինք, Երևանի բեկլարբեկության ենթակա Թուման-և Նախչևանի Ազադ-Ջիրանի մահալում գտնվող խասս գյուղերի մասին արժեքավոր տեղեկություններ են տրված Զաքարիա Ազուլեցու «Օրագրության» մեջ: Այստեղ գտնում ենք նույնքան արժեքավոր վիճակագրություններ նաև այդ գյուղերից գանձվող հարկերի «ղաբթ»-ով վարձակալվելու մասին: Այսպես, պարզվում է, որ Ազուլիսը և Ազադ-Ջիրանում գտնվող ու թագավորական խասսին պատկանող մյուս չորս ավանները (Մեղրի, Շոռոթ, Լեհրամ, Աստապատ) երկար ժամանակ գտնվել են Ազերբայջանի վեզիր Միրզա Իբրահիմի ղաբթում: 1667 թ. մեկ տարով դրանք տրվել են Երևանի բեկլարբեկի Սաֆիկուլի խանին: Մյուս տարի 1000 թումանով նորից տրվում են Միրզա Իբրահիմին և յոթ տարի հաջորդաբար մնում նրա ձեռքում: 1675 թ. հինգ խասսերը ղաբթով վերցնում է ազուլեցի Մուսաբեկի որդի Իսախան բեկը: 1680 թ. Իսախան բեկը մեռնում է և խասսերը տրվում են ում հոսարով աղայի<sup>44</sup>: «Յետո՞վ Ըսպահաննա խաբար եկավ,— գրում է Ազուլեցին,— թե Մուսաբեկի հերն որ էր Իսախան-բեկն, մեռավ: Զերայ խասերն այս Իսախան բեկս էր Իջարայ արել, այս ջանիբես խասսերն սոցանն կտրեցին»<sup>45</sup>:

Մեջ բերված հատվածից միանգամայն պարզ երևում է, որ «ղաբթը» ոչ այլ ինչ էր, եթե ոչ միայն տարբեր օբյեկտներից ստացվող հարկերի վարձակալումը (իջարե) մասնավոր մարդկանց կողմից: Նույն Իսախան բեկի մասին այլ աղբյուր Ազուլեցին գրում է. «1126 (1677)-ումն Աբուլիս էր աբուլեցի Մուսաբեկի տղայ Իսախան-բեկի ղաֆտումն: Ոչ թե միայն Աբուլիս, այլ և (5) խասս գեղն, որ Մեղրի, Աբուլիս, Շոռոթ, Լեհրամ, Աստապատ, այս և (5) գեղս շահն տվելայ Իսախան-բեկի ղաֆտն»<sup>46</sup>: Կասկած չի կարող լինել, որ «ղաֆտն» ու «իջարան» Ազուլեցու մոտ օգտագործված են որպես համանիշ տերմիններ: «Օրագրության» մեջ գործածված է նաև մեկ ծանոթ «ղաբթ» տերմինը: Այսպես, 1666 թվականի տակ կարդում ենք. «Թվին ՌձժԵ (1665) Ազուլաց ղաբուլն էր Ազիլբեջանայ վեզիր Միրզա Իբրահիմն»<sup>47</sup>:

Ինչպես տեսնում ենք, շուրջ 16 տարվա ընթացքում (1664—1680) խասս գյուղերի վարձակալները փոփոխվել են հինգ անգամ: Ըստ որում, որպես վար-

<sup>43</sup> Tadhkirat al-Muluk, p. 195.

<sup>44</sup> Տե՛ս Զաքարիա Ազուլեցի, 63, 68, 69, 70, 80, 94, 112, 119, 134, 150 էջերը:

<sup>45</sup> Նույն տեղում, էջ 150:

<sup>46</sup> Նույն տեղում, էջ 134:

<sup>47</sup> Նույն տեղում, էջ 68: